

## Conta cuenta cerca nos hendenan grandi

Na april Biblioteca Nacional Aruba a cuminsa cu su proyecto anual di contamento di storia na Cas di Anciano.

E proyecto tin duracion di tres luna. 3 contado y au-

tor cu ta riba programa e aña aki ta sra. Gwendy Sneek, sra. Amaryllis Velazquez y sr. Gerry Franca. Hunto cu un team di biblioteca nan ta bishita diferente Cas di Anciano.

Di e manera aki biblioteca

kier contribui na tene actividadnan alegre pa hendenan grandi cu ta biba na e diferente Cas pa Anciano manera e.o. Paviljoen San Pedro, Huize Maris Stella Savaneta, SABA San Nicolas y Cas Marie Savaneta. Durante e



periodo aki cada cas ta haya bishita di tres diferente contado, cada luna uno.

Otro parti di e programa ta canto y musica di e Grupo musical Zjilea dirigi pa Chencho Kelly. E proyecto 'Conta Cuenta Na Casnan di Anciano 2015' ta bou di encargo di dos bibliotecaria y Quota Club ta sostene e proyecto pa medio di un contribucion financiero. Meta ta pa stimula lesamento y contamento di storia y traspaso di cuenta.

Sra. Gwendy Sneek ta conta storia y skirbi poesia y ta pintor, el a publica 'Meimei shelo y tera na 2007. Sra. Gwendy Sneek a contribui mas biaha na e proyecto aki. E ta

conta un cuenta for di coleccion di Hubert Booi (d.f.m.) y poesia for di e antologia di Aruba, 'Cosecha Arubiano'. Sra. Amaryllis Velazquez ta docente Spaño y Papiamentu y keto bay den proceso laboral. Amaryllis ta participa pa di dos biaha como contado di storia. E ta conta 3 storia di Compa Nanzi e haraña sabi. Gerald D. Franca ('51) a publica dos buki pa mucha na Papiamentu, "Carlito y e tapadera" y 'Carlito ta bay keiro'. Tur dos ta na benta na libreria local. Gerald Franca ta skirbi storia pa adulto tambe y ta skirbi poesia.

Esaki ta e di nuebe edicion di e proyecto Conta cuenta cerca hendenan grandi di Biblioteca Nacional Aruba. □